

四庫全書

史部

欽定四庫全書

續後漢書卷七十四

元 郝經 撰

列傳第七十一

叛臣

漢

孟達

父他  
申耽

黃權

叛者反君背國不臣之甚者也春秋之時始則諸侯叛  
王次則大夫叛諸侯又其次則陪臣叛大夫聖人每謹

而書之以正不臣之罪其叛而去者祇曰出奔如衛元  
咺奔晉狐射姑出奔狄之類是也據邑而叛不得已  
而去者則曰自某奔某宋華亥向寧華定自宋南里出  
奔楚之類是也其叛皆在其人也據邑而叛以地歸我  
者則曰以某地來奔邾庶其以漆閭丘來奔莒牟夷以  
牟婁及防茲來奔黑肱以濫來奔之類是也叛人之罪  
不待貶絕而自見我之納叛人之罪尤重也然祇曰奔  
不曰叛猶未絕之也入國據邑以叛者則曰入于某以

叛衛孫林父入于戚以叛晉趙鞅入于晉陽以叛晉荀  
寅士吉射入于朝歌以叛之類是也入則逆辭以則彊  
辭故直書叛絕之也援外國入國據邑披地逼君以叛  
者則曰自某國入某國據某地以叛宋華亥向寧華定  
自陳入于宋南里以叛宋公之弟辰及仲佗石彊公子  
地自陳入于蕭以叛之類是也曰自曰入曰以曰叛言  
重辭複甚之也所以辨名定分申固王法人臣委質可  
死而不可叛也人君制命可殺而不可較也三國之義

魏為篡漢之盜吳始叛漢而終為漢與國犄角治魏故漢臣之始入于吳終降于魏吳臣之遂降于魏皆叛臣也魏之臣亦有入吳者矣欲正君討賊故申其志而不治也篡叛人為叛臣篇云

孟達字子度扶風人也父他靈帝時中常侍張讓專朝讓監奴典護家事招權納賂賣官鬻獄他仕不遂乃盡以其家財賂監奴與共結親積年家業為之破盡衆奴皆慙問他所欲他曰欲得卿曹拜爾奴被恩久皆許諾

時賓客求見讓者門車常數百乘或累日不得通他最後到衆奴伺其至皆迎車而拜徑將他車獨入衆人悉驚謂他與讓善爭以珍物遺他得之盡以賂讓讓大喜他又以葡萄酒一斛遺讓即拜涼州刺史他生達劉璋之遣法正迎昭烈也令達副正各將二千人昭烈因令達并領正衆留屯江陵蜀平以達為宜都太守建安二十四年命達從秭歸北攻房陵房陵太守蒯祺為達兵所害達將攻上庸昭烈疑達難獨任遣養子副軍中郎

將劉封自漢中乘沔水下統達軍與達會上庸上庸太守申耽舉郡降遣妻子宗族詣成都昭烈加耽征北將軍領上庸太守員鄉侯如故以耽弟儀為建信將軍西城太守遷封為副軍將軍達耽儀並聽節制關羽圍樊城襄陽連呼封達發兵自助封達辭以山郡初附未可動搖不承羽命會羽覆沒昭烈恨之封與達復忿爭不和奪達鼓吹達既懼罪又忿恚封遂表辭昭烈曰伏惟殿下將建伊呂之業追桓文之功大事草創假勢吳楚

是以有為之目深覩歸趣臣委質以來愆戾山積臣猶

自知況於君乎今王朝以興英俊鱗集臣內無輔佐之

器外無領將之才列次功臣誠自愧也臣聞范蠡識微

浮於五湖舅犯謝罪逡巡河上

原注左氏傳秦伯納公子重耳及河子犯以璧

授公子曰臣負羈縻從君巡于天下臣之罪多矣臣猶知之而況君乎請由此亡公子曰所不與舅氏同心者有如白水授其璧於河夫際會之間請命乞身何則欲潔去就之

分也況臣卑鄙無元功巨勲自繫於時竊慕前賢早思

遠恥昔申生至孝見疑於親子胥至忠見誅於君蒙恬



拓境而被大刑樂毅破齊而遭讒佞臣每讀其書未嘗  
不慷慨流涕而親當其事益以傷絕何者荊州覆敗大  
臣失節百無一還惟臣尋事自致房陵上庸而復乞身  
自放於外伏想殿下聖恩感悟愍臣之心悼臣之舉臣  
誠小人不能始終知而為之敢謂非罪臣每聞交絕無  
惡聲去臣無怨辭臣過奉教於君子願君王勉之也率  
所領降魏時曹丕初即王位既宿知達聞其來甚悅令  
貴臣有識察者往觀之還曰將帥之才也或曰卿相之

器也不益欽達逆與達書曰近日有命未足達旨何者  
昔伊摯背夏而歸商百里去虞而入秦樂毅感鴈夷而  
蟬蛻王遵識逆順以去就皆審廢興之符效知成敗之  
必然丹青畫其形容良史載其功勲聞卿姿度純茂器  
量絕優當騁能明時收名傳記今者翻然濯鱗清流甚  
相嘉樂虛心西望依依若舊下筆屬辭懽心從之昔虞  
卿入趙再見取相陳平就漢一覲參乘孤今於卿情過  
於往故致所御馬物以昭忠愛又曰今者海內清定萬

里一統三垂無風塵之警中夏無狗吠之虞是以弛網  
闊禁與世無疑保官空虛初無資任卿來相就當明孤  
意慎勿令家人續紛道路以親駭疏也若卿欲來相見  
當且先安部曲有所保固然後輕騎徐徐來東達至譙  
進見容觀閒雅才辨過人衆皆屬目丕乘小輦將出執  
達手撫其背曰卿得無為劉備刺客邪遂與同載以為  
散騎常侍建武將軍封平陽亭侯合房陵上庸西城三  
郡達領新城太守委以西南之任羣臣以為待之太過

不宜委以方任丕曰吾保其無他亦譬以蒿箭射蒿中  
爾遣征南將軍夏侯尚右將軍徐晃與達共襲封達遺  
書勸封降封不答申儀叛封封走成都昭烈殺之申耽  
遂降魏魏假耽懷遠將軍徙居南陽儀魏興太守封真  
鄉侯屯洵口達初入新城登白馬塞歎曰劉封申耽有  
金城千里而失之乎聞者知其必復叛也諸葛亮南征  
至漢陽縣降人李鴻詣亮時蔣琬費詩在坐鴻曰間過  
孟達所適見王冲從南來言往者達之去就明公切齒

欲誅達妻子賴先帝不聽爾

謹案陳志費詩傳載詩語及諸葛亮書稱昭烈皆曰

先主蓋陳壽所改書今此作先帝為得其實

達曰諸葛亮見顧有本末終不

爾也盡不信冲言委仰明公無復已已亮謂琬詩曰還

都當有書與子度相聞詩進曰孟達小子昔事振威不

忠後又背叛先帝反覆之人何足與書邪亮默然不答

亮欲誘達以為外援竟與達書曰往年南征歲未及還

適與李鴻遇於漢陽承知消息慨然永歎以存足下平

素之志豈徒託名榮貴為乖離乎

謹案陳志費詩傳作華離冊府及通志俱

作乖離與此合志誤

嗚呼孟子斯實劉封侵陵足下以傷先帝待士之義又鴻道王冲造作虛語云足下度量吾心不受冲說尋表明之言追平生之好依依東望故遣有書達得亮書數相交通始達為曹丕所寵又與桓階夏侯尚親善既而丕及階尚皆卒遂失寵賴內不自安於是復謀歸漢達與申儀有隙儀密表達有異志達聞之惶懼欲舉兵司馬懿以書慰解之達猶豫未發懿乃潛軍進討諸將言達與吳漢交通宜觀望而後動懿曰達無信

義此其相疑之時也當及其未定促決之乃倍道兼行八日到其城下吳漢各遣偏將向西城安橋木蘭塞以救達懿分諸將以拒之初達與亮書曰宛去雒八百里去吾一千二百里聞吾舉事當表上請命比相反覆一月間也則吾城已固諸軍足辦吾所在深險司馬懿必不自來諸將來吾無患矣及兵到達又告亮曰吾舉事八日而兵至城下何其神也懿攻新城旬有六日拔之

斬達

原注魏略曰宣王誘達將李輔及達甥鄧賢等開門內軍達被圍旬有六日而敗焚其首于雒陽

四達申儀久在魏興擅承制刻印多所假授懿召而執之

之歸於雒陽申耽字義舉初在西平上庸間聚衆數千家故與張魯通又遣使詣曹操操加其號為將軍領上庸都尉達平弟儀內徙耽卒於南陽王冲者廣漢人為牙門將統屬江州督李嚴為嚴所疾懼罪降魏魏以冲為樂陵太守

黃權字公衡巴西閬中人也少為郡吏州牧劉璋召為主簿時別駕張松建議宜迎昭烈使伐張魯權諫

原注蜀志



曰左將軍有驍名今請到欲以部曲遇之則不滿其心欲以賓客禮待則一國不容二君若客有泰山之安則主有累卵之危可

璋不聽出權為廣漢長及昭烈收襲

但關境以待河清

取益州將帥分下郡縣郡縣望風景附權閉城堅守劉

璋稽服乃詣昭烈降昭烈假權偏將軍

原注徐衆評曰權既忠諫於主

又閉城拒守得事君之禮武王下車封比干之墓表商客之闇所以大顯忠賢之士而明示所貴之旨先主假權將軍善矣然猶薄少未足彰忠

義之高節而大勸為善者之心及曹操破張魯魯走

入巴中權進曰若失漢中則三巴不振此為割蜀之股臂也於是昭烈以權為護軍率諸將迎魯魯已還南鄭

北降曹操然卒破杜護朴胡殺夏侯淵據漢中皆權本謀也昭烈為漢中王猶領益州牧以權為治中從事及即位將東伐吳權諫曰吳人悍戰水軍順流進易退難臣請為先驅以嘗寇陛下宜為後鎮昭烈不從以權為

鎮北將軍督江北軍以防魏師昭烈自軍江南

謹案陳志作自

在江南及吳將陸遜乘流斷圍南軍敗績昭烈引退而道

隔絕權不得還故率所領并南郡太守史郤等三百一十八人詣荊州刺史奉上所假印綬祭戟幢麾牙門鼓

車降魏曹丕置酒設樂引見於承光殿丕謂權曰君舍  
逆效順欲追蹤陳韓邪權對曰臣過受漢王殊遇降吳  
不可還蜀無路是以歸命且敗軍之將免死為幸何古  
人之可慕也不善之賜權金帛車馬衣裳帷帳妻妾下  
及偏裨皆有差拜權為侍中鎮南將軍封列侯即日召  
使驂乘及封史邵等四十二人皆為列侯為將軍郎將百  
餘人漢有司執法白收權妻子昭烈曰朕負權權不負  
朕也待之如初

原注裴松之曰漢武用虛枉之言滅李  
之家劉主拒憲司所執宥黃權之室

二主得失縣邈速矣詩云樂只漢降人或云誅權妻子  
君子保父爾後其劉主之謂也

權知其虛言未便發喪曹丕詔權令發喪權答曰臣與  
劉葛推誠相信明臣本志疑惑未實請須後問後得審  
問果如所言昭烈函問至魏羣臣咸賀而權獨否丕察  
權有局量欲試驚之遣左右詔權未至間累催相屬馬  
使奔馳交錯於道官屬侍從莫不震懼而權舉止自若  
後領益州刺史徙占河南大將軍司馬懿深器之問權  
曰蜀中有卿輩幾人權笑而答曰不圖明公見顧之重

也懿與諸葛亮書曰黃公衡快士也每坐起歎述足下  
不去口實曹叡景初三年遷車騎將軍儀同三司叡問  
權天下鼎立當以何地為正權對曰當以天文為正往  
者熒惑守心而文皇帝崩吳蜀二主平安此其徵也

謹案

王應麟困學紀聞曰黃權對魏明帝之言若可以魏為  
正矣月犯心大星王者惡之漢昭烈殂而魏吳無他權  
將何辭以對明年卒謚曰景侯子邕嗣邕無子絕權留蜀子

崇為尚書郎隨衛將軍諸葛瞻拒鄧艾戰於綿竹死之  
議曰孟達反覆逞其梟黠終于誅滅宜矣黃權知慮逼

臆屢形忠諫有大將軍之才不幸而陷入曹氏昭烈以  
負權自責權惜一身覲面偽朝豈不負昭烈哉若郝普  
糜芳士仁吳之韓綜孫秀孫壹步闡孫楷皆漢吳叛人  
概見諸傳普為吳譎舉零陵以降使漢分荊州而不能  
討賊犄角用武芳仁為吳譎使吳襲殺關羽遂失荊州  
而不能討賊三子之罪大矣吳之叛人大抵皆孫皓時  
多其宗人孟子曰寡助之至親戚叛之故叛者有罪致  
叛者獨無罪乎紂貫盈而億兆離皓惡稔而親宗叛天

命絕去稱為獨夫遂底滅亡可不戒哉

贊曰策名委質是守是死山岳可移心無彼此偷生隕  
節挈瓶畀人尚克視息豈為人臣

欽定四庫全書

續後漢書卷七十五上

元 郝經 撰

列傳第七十二上

篡臣

魏

司馬懿

子師

昭

司馬孚

子望

夫取不以道曰篡殺越人于貨閔不畏死凡民罔弗慙  
不待教而誅之况放弑奪攘盜有神器者哉故弑兄而



有國者篡其兄者也

原注魯公子翬弑隱公桓公以弟篡立是也

弑父而有

國者篡其父者也

原注楚太子商臣弑其父成王而立是也

弑君而有國者

篡其君者也

原注齊田恒弑簡公而有其國是也

立於弑逆之賊而不討

亦篡也

原注晉成公立而不討趙盾是也

推惡於人而誅之亦篡也

原注

魯羽父立桓公而討

由已以致弑亦篡也

原注楚公子比劫立而靈

王繼是也

逼而從人亦篡也

原注鄭歸生從子家弑靈公是也

紿而不悟亦

篡也

原注晉張貴人弑孝武而云因魔暴崩而安帝不討是也

王法所不赦春秋所

必絕慘焉為天下萬世之大變必殘其人瀦其宮以為

亂臣賊子戒故曰君親無將將而必誅凡寬假縱釋者  
謂之獎篡又何從而與之乎自王道陵夷春秋不作三  
家始篡晉田氏始篡齊然祇有一國而未有天下遂受  
命而帝者厥後莽雖僭竊繼即鬻滅而光武中興曹氏  
欺奪雖有中國而帝統自在昭烈天下猶夫漢也至司  
馬氏父子四世穿穴締構弑一君原注高貴鄉公廢二君原注齊王  
芳陳留王奐戕落本支誅除人望賊殺義士酷甚新室曹氏  
之初遂取漢篡魏平吳盜有天下受命而帝十有八世

載祀二百自昔篡弑未有若斯之極也當時史臣為尊  
親諱自為一代不敢貶抑其一時篡竊臣僚皆與為佐  
命元勳猶未既備責也至後世著述者因仍不革是獎  
篡也不可以訓故正名定分以懿師昭為首惡賈充諸  
人為魏臣而盜魏與晉者皆以為篡臣如宣王景王文  
王等不制之號皆削而不書始終名之如操之於漢云  
嗚呼始作俑者其無後乎自晉而下宋弑兩君而篡原注  
安帝齊弑兩君而篡原注王順帝蒼梧梁弑一君而篡原注  
恭帝陳和帝

弑一君而篡

原注敬帝

隋弑一君而篡

原注靜帝

後梁弑兩君而

篡

原注昭宗昭宣帝

後晉弑一君而篡

原注潞王

後周弑二君而篡

原注隱帝湘陰公

皆無討而有天下三代二漢之治不復見生

民之禍日深以篡弑奪攘為常事三綱淪九法斁皆晉  
啟之也可不治哉可不絕哉

司馬懿字仲達京兆尹防之子兖州刺史朗之弟也有  
狼顧相反顧則面正向後而身不動博學洽聞性深阻  
若城府任智數多奇畧尤善孫吳兵法見漢室衰亂潛

蓄異志建安六年郡舉上計掾曹操為司空辟之懿以風痺辭操使人夜往刺之曰若動即殺之懿堅卧不動及操為丞相又辟文學掾敕曰若復盤桓便收之懿懼而從命使與子丕游處遷黃門侍郎轉議郎丞相東曹屬尋轉主簿操為魏王轉太子丕中庶子丕信重之遷軍司馬孫權請降上表稱臣陳說天命懿即勸操代漢操不納尋卒曹丕立封河津亭侯轉丞相長史及篡代以懿為尚書頃之轉督軍御史中丞封安國鄉侯黃初

二年督軍官罷遷侍中尚書右僕射五年丕觀兵吳疆  
留懿鎮許昌改封向鄉侯轉撫軍假節領兵五千加給  
事中錄尚書事六年丕復大興舟師伐吳復命懿居守  
太和四年遷大將軍加大都督假黃鉞景初元年增封  
食昆陽并前二縣

謹案晉書增封事在景初二年

初燕王宇謂叡關中

事重宜遣懿便道從河內西還詔已行而叡疾篤復納  
劉放計罷宇召懿叡自力為詔呼宮中常所給使者曰  
辟邪來汝持我此詔授太尉也辟邪馳去初懿至襄平

夢敵枕其膝曰視吾面俛視有異於常心惡之及受詔便道鎮關中次于白屋而辟邪以詔至令馳入雒陽三日間詔書五至手詔曰間側息望到到便直排閣入視吾面懿疑雒陽有變乃乘追鋒車晝夜兼行自白屋四百餘里一宿而至入嘉福殿卧内升御牀流涕問疾敵執懿手曰死乃復可忍朕忍死待卿指示齊王芳曰此是也卿其輔此朕無所復恨又教齊王令抱懿頸懿頓首流涕曰陛下不見先帝屬臣以陛下乎遂與大將軍

曹爽並受遺詔輔少主芳立遷侍中持節都督中外諸  
軍錄尚書事與爽各統兵三千人共執朝政更直殿中  
乘輿入殿爽欲使尚書奏事先由已乃徙懿為大司馬  
朝議以為前後大司馬累薨於位乃以懿為太傅入殿  
不趨贊拜不名劔履上殿如漢蕭何故事正始二年秋  
七月增封食鄆臨潁并前四縣邑萬戶勲望日盛而謙  
恭愈甚八年夏四月曹爽用何晏鄧颺丁謐謀遷郭太  
后於永寧宮專擅朝政兄弟並典禁兵多樹親黨屢改



制度懿於是與爽有隙五月懿稱疾不與政事九年春三月黃門張當私出掖庭才人石英等十一人與曹爽為伎人爽乃與當密謀不測懿潛為之備爽黨亦頗疑懿會河南尹李勝將往荊州辭懿懿詐為疾篤錯亂其辭勝退告爽曰司馬公尸居餘氣形神已離不足慮也故爽等不復設備嘉平元年春正月甲午曹芳謁高平陵爽兄弟皆從是日太白襲月懿於是奏郭太后廢爽兄弟時懿子師為中護軍將兵屯司馬門懿列陳闕下

於是假司徒高柔節行大將軍事領爽營命太僕王觀  
行中領軍攝義營懿親帥太尉蔣濟等勒兵出迎芳屯  
於碓水浮橋上奏爽等爽惶懼通懿奏既而有司發爽與  
何晏等謀反事乃收爽兄弟及其黨與何晏丁謐鄧颺  
畢軌李勝桓範等誅之皆夷三族二月芳使太常王肅  
冊命懿為丞相增封潁川之繁昌鄢陵新汲父城并前  
八縣邑二萬戶奏事不名如漢霍光故事懿上書辭讓  
書十餘上冬十二月許之復加九錫朝會不拜懿言太

祖有大功德漢氏崇重故加九錫此乃歷代異事非後代所得議也又辭不受兗州刺史令狐愚太尉王凌見懿威詐益盛謀廢芳立楚王彪因黜懿三年春正月王凌詐言吳人寨淦水請發兵討之懿知其謀不聽夏四月懿自帥中軍汎舟沿流九日而到甘城凌計無所出乃逆于武丘面縛水次以凌歸雒陽至項凌仰鵠死收其餘黨皆夷三族并殺彪悉錄魏諸王公置于鄴命有司監察不得交關六月懿寢疾夢賈逵王凌為祟甚惡

之秋八月戊寅卒于雒陽年七十三芳素服臨弔喪葬  
威儀依漢霍光故事九月庚申葬于河陰謚曰文貞後  
改謚文宣子昭為晉王追尊曰宣王武帝篡代上尊號  
曰宣皇帝陵曰高原廟稱高祖懿內忌外寬猜阻多權  
變當操丕世勤於吏職輸力効計夜以忘寢至於芻牧  
之間悉皆臨履由是卒無猜嫌及平公孫淵大行殺戮  
誅曹爽并其支黨男女無少長姑姊女子之適人者皆  
殺之遂專大柄昇之師昭竟遷魏鼎云師字子元懿長

子也沈毅多大略景初中拜散騎常侍累遷中護軍正始末懿將襲誅曹爽獨與師謀師陰養死士三千散在人間至是一朝而集事平以功封長平侯懿卒師令其黨白芳云伊尹既卒伊陟嗣事乃命師以撫軍大將軍輔政遷大將軍加侍中持節都督中外諸軍錄尚書事正元元年春正月曹芳以師擅政弱寡王室不得有為乃密與中書令李豐后父光錄大夫張緝黃門監蘇鑠永寧署令樂敦冗從僕射劉放等謀以太常夏侯玄

代師輔政師密知之殺豐捕誅玄緝等皆夷三族三月  
乃諷芳廢皇后張氏增師邑九千戶并前四萬戶師讓  
不受芳以玄緝之誅深不自安而師亦慮難作潛謀廢  
立乃諷郭太后下令廢芳詔公卿會議羣臣失色師流  
涕曰皇太后令如是其若王室何咸曰昔伊尹放太甲  
以寧殷霍光廢昌邑以安漢夫權定社稷以濟四海二  
代行之於古明公當之於令今日之事亦惟公命師曰  
諸君所以望師者重師安所避之於是乃與羣臣共為

奏曰帝不可以承天緒臣請依漢霍光故事收帝璽綬  
帝本以齊王踐阼宜歸藩于齊使司徒臣柔持節與有  
司以太牢告祀宗廟遣郭芝入白郭太后后與芳對坐  
芝謂芳曰大將軍奏廢陛下芳乃起郭太后不悅芝曰  
太后有子不能教今大將軍意已成又勒兵于外以備  
非常但當順旨將復何言郭太后曰我欲見大將軍口有  
所說芝曰何可見邪但當速取璽綬郭太后意折乃遣  
傍侍御取璽綬著坐側芝出報師師喜乃遣使者授齊

王印綬當出就西宮芳受命涕泣與郭太后別就乘輿副車從太極殿南出是日與羣臣議所立師曰彭城王據太祖之子以賢則仁聖明允以年則皇室之長乃與羣公奏郭太后使請璽綬郭太后曰彭城王我之季叔也今來立我當何之且明皇帝當絕嗣乎吾以為高貴鄉公者文皇帝之長孫明皇帝之弟子於禮小宗有後大宗之義其詳議之師乃更召羣臣以郭太后令示之乃定迎高貴鄉公曹髦奏可使中護軍望兼太常河南



尹肅持節與少府褒尚書亮侍中表等奉法駕迎髦于  
元城師復請璽綬郭太后曰我見高貴鄉公小時識之  
明日我欲以璽綬手授之也髦至乃親受璽綬己詔曰  
德茂者位尊庸大者祿厚古今之通議也其登位相國增  
邑九千并前四萬戶進號大都督假黃鉞入朝不趨奏  
事不名劔履上殿賜錢五百萬帛五千足以彰元勲師  
固辭相國初師目有瘤使醫割之驚而目出謹案正元  
二年司馬  
師伐母丘儉文欽欽子騫來攻驚而蒙之以被痛甚齧  
目出事見陳志母丘儉傳及晉書

被敗而左右莫知閏月疾篤使弟昭總統諸軍辛亥卒  
于許昌年四十八二月喪至雒陽髦素服臨弔詔曰公  
有濟世寧國之勲克定禍亂之功重之以死王事宜加  
殊禮其令公卿議制有司議以為忠安社稷功濟宇內  
宜依霍光故事追加大司馬之號以冠軍大將軍增邑  
五萬戶謚曰忠武昭為晉王追尊曰景王武帝篡代上  
尊號曰景皇帝陵曰峻平廟稱世宗昭字子上景初三  
年封新城鄉侯正始初為雒陽典農中郎將值曹叡奢

侈之後昭蠲除苛役勸農趨時百姓大悅轉散騎常侍  
曹爽寇漢以昭為征蜀將軍副夏侯玄出駱谷次于興  
勢漢將王林夜襲昭昭堅卧不動林退昭謂玄曰費禕  
已據險距守進不獲戰攻之不可宜亟旋軍以為後圖  
爽等乃退遂拜議郎及誅爽帥衆衛二宮以功增邑千  
戶夏四月還雒陽髦命改丘頭曰武丘以旌武功謹案  
晉書  
文帝紀甘露三年春二月斬諸葛誕夏四月歸于京師  
魏帝命改丘頭曰武丘以旌武功曹爽之誅在齊王芳  
嘉平元年與甘露三年相隔十載中間攻戰封拜事實  
不一今於及誅曹爽帥衆衛二宮以功增邑千戶下即

接夏四月歸于洛陽  
夏四月上有關文

五月髡以并州之太原上黨西河

樂平新興雁門司州之河東平陽八郡地方七百里封  
昭為晉公加九錫進位相國晉國置官司馬九讓乃止  
於是增邑萬戶食三縣諸子無爵者皆封列侯秋七月  
奏錄先世名臣元功之子孫隨才叙用四年夏六月分  
荊州置二都督王基鎮新野州泰鎮襄陽使石苞都督  
揚州陳騫都督豫州鍾毓都督徐州宋均監青州諸軍  
事景元元年夏四月髡復命加爵秩如前又讓不受髡

以昭三世宰輔政非已出情不能堪又慮廢辱將臨軒  
召百寮廢昭五月戊子夜使冗從僕射李昭等發甲於  
凌雲臺召侍中王沉散騎常侍王業尚書王經出懷中  
黃素詔示之戒嚴待旦沉業馳告昭昭召護軍賈充等  
為之備髦知事泄帥左右攻昭充使太子舍人成濟抽  
戈犯蹕及出於背髦殞于車下昭召百寮議使郭太后  
下令廢髦為庶人以民禮葬之以王經貳於已殺之又歸  
弑逆之罪於成濟收濟家屬付廷尉濟兄弟不即服罪

袒而升屋醜言悖罵自下射之乃殪遂夷三族與公卿  
議立燕王曹宇之子常道鄉公璜更名真真進昭為相  
國封晉公增十郡加九錫如初羣從弟子未侯者封亭  
侯賜錢十萬帛萬匹固讓乃止二年秋八月甲寅真使  
太尉高柔授昭相國印綬司空鄭沖致晉公茅土九錫  
固辭三年夏四月肅慎來獻楛矢石弩弓甲貂皮真命  
歸於大將軍府四年冬十月真以命諸將攻破蜀漢獻  
捷交至乃申前命封為晉公丙午真命昭子中撫軍新

昌侯炎為晉世子咸熙二年春二月朐腮縣獻靈龜歸  
於相國府夏四月孫皓使紀陟來聘且獻方物五月奐  
命昭冕十有二旒建天子旌旗出警入蹕乘金根車駕六  
馬備五時副車置旄頭雲罕樂舞八佾設鍾簾宮懸位  
在燕王上進王妃為王后世子為太子王女王孫爵命  
之號皆如帝者之儀晉國置御史大夫侍中常侍尚書  
中領軍衛將軍官秋八月辛卯昭卒年五十五九月癸  
酉葬崇陽陵謚曰文王世子炎嗣為相國晉王初昭以

兄師嫡長早世無後以炎弟攸為師嗣自謂攝居相位  
百年之後大業宜歸攸每曰此景王之天下也將立世  
子屬意於攸何曾等固爭曰中撫軍聰明神武有超世  
之才髮委地手過膝此非人臣之相也由是以炎為世  
子炎既嗣立遂欲代魏諷曹真遜位真乃使太保鄭沖  
奉皇帝璽綬禪位于晉炎初以禮讓魏朝公卿何曾王  
沈等固請乃從之設壇于南郊即皇帝位追尊昭曰文  
皇帝廟號太祖



司馬字字叔達懿之弟也初字長兄朗字伯達懿仲達  
字弟祖字季達恂字顯達進字惠達通字雅達敏字幼  
達俱知名故時號為八達字溫厚廉讓博涉經史漢末  
喪亂與諸昆蔬食水飲披閱不勸臨淄侯植妙選官屬  
以字為文學掾及曹丕為太子徙為太子中庶子曹操  
卒丕號哭不已字諫曰大行晏駕天下恃殿下為命當  
上為宗廟下為萬國柰何效匹夫之孝乎丕乃止羣臣  
亦號哭無復行列字厲聲曰大行晏駕天下震動當早

拜嗣君以鎮海內而但哭邪遂與尚書和洽備禁衛具喪事奉丕即位時當選侍中常侍等官丕左右舊人頗諷諭主者便欲就用不調餘人孚曰雖有堯舜必用稷契今嗣君新立當進用海內英賢猶患不得如何欲因際會自相薦舉乎官失其任得者亦不足貴遂更他選轉孚中書郎給事常侍宿省內除黃門侍郎加騎都尉時孫權稱藩請送任子及遣前將軍于禁還久而不至丕以問孚孚曰先王設九服之制為要荒難以德懷故

不以諸夏禮責陛下承緒遠人率貢權雖未送任子于  
禁不至必有故猶宜以寬待之畜養士馬以觀其變後  
禁至果以疾遲留而任子竟不至出為河內典農賜爵  
關內侯轉清河太守初曹丕置度支尚書專掌軍國支  
計衆議以征討未息動靜節量度支為重及曹叡立欲  
用孚問左右曰有兄風不答云似兄叡曰吾得司馬懿  
二人復何憂哉轉為度支尚書孚以為擒敵制勝宜有  
備預每諸葛亮寇關中邊兵不能制中軍奔赴輒不及

事機宜預選步騎二萬為討賊備又以關中連遭兵寇穀帛不足遣冀州農丁五千屯於上邽秋冬習戰春夏務農由是關中軍資有餘後除尚書右僕射進爵昌平亭侯遷尚書令及大將軍曹爽專擅朝政懿既稱疾字亦不視事及懿誅爽字與師屯司馬門以功進爵長社縣侯加侍中吳諸葛恪圍新城以孚督諸軍二十萬救之孚次壽春遣毋丘儉文欽等進討諸將欲速擊之孚曰夫攻者借人之力以為功不可力爭也故稽留月餘

乃進軍吳師望風而退遷司空代王凌為太尉及漢衛  
將軍姜維出隴右雍州刺史王經戰敗遣孚西鎮關中  
統諸軍事征西將軍陳泰與安西將軍鄧艾進擊維維  
退轉太傅及曹髦遇弑百官莫敢奔赴孚枕屍股哭之  
曰弑陛下者臣之罪也奏推主者會郭太后令以庶人  
禮葬孚與羣公上表乞以王禮葬從之後進封長樂公  
及武帝篡代曹真就金墉城孚拜辭執真手流涕獻款  
不能自勝曰臣死之日固大魏之純臣也詔曰太傅勲

德弘茂朕所瞻仰以光導弘訓鎮靜宇內願奉以不臣之禮其封為安平王邑四萬戶進拜太宰持節都督中外諸軍事奉絹二千匹及元會詔孚乘輿上殿帝於阼階迎拜既坐帝親奉觴上壽如家人之禮帝每拜字跪而止之又給以雲母輦青蓋車孚雖見尊寵不以為榮常有憂色臨終遺令曰有魏貞士河南溫縣司馬孚字叔達不伊不周不夷不惠立身行道終始如一當以素棺單槨斂以時服泰始八年卒年九十三帝於太極東

堂舉哀三日給東園溫明祕器朝服一具衣一襲緋練  
百匹絹布各五百匹錢百萬穀千斛以供喪事諸所施  
行皆依漢東平憲王蒼故事其家遵享遺旨所給器物  
一不施用帝再臨喪親拜盡哀及葬又幸都亭望柩而  
拜哀動左右給鑾輅輕車介士虎賁百人吉凶導從二  
千餘人前後鼓吹配饗太廟九子邕望輔翼晃瓌珪衡景  
望字子初出繼伯父朗寬厚有父風仕郡上計吏舉孝  
廉辟司徒掾歷平陽太守雒陽典農中郎將司馬懿討

王凌以功封永安亭侯遷護軍將軍改封安樂鄉侯加散騎常侍曹髦好才愛士望與裴秀王沈鍾會並見親待數侍宴會髦性急秀等居內職急有召便至以望外官特給追鋒車一乘虎賁五人師昭相繼輔政未嘗朝覲權歸晉室望雖見寵待每不自安由是求出為征西將軍持節都督雍涼二州諸軍事漢衛將軍姜維屢侵關中及望至廣設方略維不敢深入進封順陽侯徵拜衛將軍領中領軍典禁兵尋加驃騎將軍開府頃之代



何曾為司徒武帝篡代封義陽王邑萬戶給兵二千人  
吳將施績攻江夏邊境騷動以望統中軍步騎二萬出  
屯龍陂為二方重鎮假節加大都督諸軍事會荊州刺  
史胡烈距績破之望乃班師俄而吳將丁奉攻芍陂望  
又率諸軍赴之未至而奉退拜大司馬孫皓率眾向壽  
春詔望統中軍二萬騎三千據淮北皓退軍罷泰始七  
年卒年六十七賻贈有加望性儉吝而好聚斂身亡之  
後金帛盈溢以此獲譏四子奕洪整楸

議曰司馬氏得政而八達韓韓繼起盛於齊之諸田魏  
方疎絕骨肉日益孤危不及劉氏之季廢興之迹著于  
是矣初誅曹爽孚以尚書令為司空及誅王凌由司空  
為太尉既誅毋丘儉廢齊王立高貴鄉公則以太尉為  
太傅居懿之位終于魏世坐視師昭之逆而不去武帝  
篡代以皇叔祖父封為安平王原情定罪則懿之次也  
其送齊王則悲不自勝弑高貴則枕屍而哭廢陳留則  
拜辭隕涕亦猶莽之抱孺子而泣操之將終涕泣而分

香析履一不及禪代之事以一把淚欺天下萬世也臨終遺令曰有魏貞士自今視之則魏之大姦也又曰不伊不周不夷不惠此正鄉原賊德之甚者中心蘊蓄盡露此語矣

謹案司馬懿諸傳於其征伐事蹟多削而不載蓋事蹟已分見於他傳及晉書本紀此特著其篡代之迹而已司馬孚傳削其奏議等文意亦猶此也

欽定四庫全書

續後漢書卷七十五下

元 郝經 撰

列傳第七十二下

篡臣

王沈

賈充

韓壽壽子謚

鄭冲

王祥

弟覽

何曾

子邵

石苞

子崇

陳騫

荀顗

裴秀

荀勗

馮統

王沈字處道司空昶之兄子也祖柔漢匈奴中郎將父

欽定四庫全書

續後漢書  
卷七十五下

機東郡太守沈少孤養於昶事繼母寡嫂以孝敬稱好  
學善屬文大將軍曹爽辟為掾累遷中書黃門侍郎及  
爽誅以故吏免後起為治書侍御史轉祕書監正元中  
遷散騎常侍侍中典著作及髡將攻司馬昭告沈及王  
業沈業馳白昭遂弑髡而立曹奐以功封安平侯邑二  
千戶尋遷尚書出監豫州諸軍事奮武將軍豫州刺史  
遷征虜將軍持節都督江北諸軍事五等初建封博陵侯  
侵漢之役吳人大出救漢振蕩邊境沈鎮禦有方卒皆

無虞轉鎮南將軍武帝立拜御史大夫守尚書令加給  
事中沈以才望顯名當世是以篡代之事羊祜荀勗裴  
秀賈充等皆諮謀於沈以佐命勲轉驃騎將軍錄尚書  
事加散騎常侍統督城外諸軍事封博陵郡公時荀顗  
為司空鄭沖為太傅王祥為太保何曾為太尉石苞為  
大司馬賈充為車騎將軍陳騫為大將軍同時並拜皆  
封郡公號曰八公泰始二年卒謚曰元沈素清儉不營  
產業使所領兵作屋五十間而已子浚嗣

賈充字公閭豫州刺史達之子也達晚生充言後當有  
充閭之慶故以為名字焉充少孤居喪以孝聞襲父爵  
為侯拜尚書郎典定科令累遷黃門侍郎汲郡典農中  
郎將參大將軍軍事從司馬師討毋丘儉文欽於樂嘉  
師疾篤還許昌召充監諸軍事後為司馬昭大將軍司  
馬轉右長史諸葛誕舉兵充進計曰楚兵輕而銳若深  
溝高壘以敵之可不戰而克也昭從之誕平昭先歸雒  
陽留充統後事進爵宣鄉侯遷廷尉轉中護軍曹髦之

討昭也王沈王業奔告於昭昭為之備髻率僮僕數百  
鼓譟而出昭弟屯騎校尉佃入遇髻于東止車門左右  
呵之佃衆奔散充遂率衆逆髻戰於南闕下髻自用劒  
衆欲退太子舍人成濟謂充曰事急矣當云何充曰司  
馬公畜養汝等正為今日今日之事無所問也濟即前  
抽戈刺髻刃出於背殞于車下曹奐立進封安陽鄉侯  
增邑千二百戶統督城外諸軍加散騎常侍鍾會反於  
蜀昭假充節以本官都督關中隴右諸軍事西據漢中



未至而會誅時軍國多事充與裴秀王沈荀勗同受腹  
心之任昭又命充定律假金章賜甲第一區五等建  
封臨沂侯為晉元勲深見寵異祿賜優於百官初昭以  
兄師恢贊王業欲傳位於舞陽侯攸充稱武帝寬仁且  
又嫡長宜主社稷及昭寢疾武帝請後事昭曰知汝者  
賈公閭也武帝襲王位拜充晉國衛將軍儀同三司給  
事中改封臨潁侯及篡代以充開建大命遷車騎將軍  
散騎常侍尚書僕射更封魯郡公母柳氏為魯國太夫

人初柳氏知古今重節義竟不知成濟事出於充每罵  
濟為逆賊左右無不竊笑賜充子弟一人關內侯後代  
裴秀為尚書令常侍車騎將軍如故尋改常侍為侍中  
以母憂去職上表欲立勲邊境帝不許又以充女為齊  
王妃使持節都督秦涼二州諸軍事侍中車騎將軍如  
故假羽葆鼓吹給第一駟馬朝賢欲進忠規者皆幸充  
去而荀勗為充畫策以女為太子妃會京師大雪平地  
二尺軍不得發既而太子當婚遂不行朝臣畏充側目

吳將孫秀降拜為驃騎大將軍帝以充舊臣欲改班使車騎居驃騎之右充固讓尋遷司空侍中尚書令領兵如故會帝寢疾充及齊王攸荀勗參侍醫藥帝疾篤朝廷屬意於攸河南尹夏侯和謂充曰卿二女壻親疏等耳然當立德充不答及帝疾愈聞之乃奪充兵而位遇無替尋轉太尉行太子太保錄尚書事咸寧三年日蝕三朝充請遜位不許更以沛國之公丘並其封伐吳之役詔充為使持節假黃鉞大都督統六師給羽葆鼓吹

緹幢兵萬人騎二千置左右長史司馬從事中郎增參  
軍騎司馬各十人帳下司馬二十人大車官騎各三十  
人充慮大勲不捷表陳西有昆夷之患北有幽并之戎  
天下勞擾年穀不登興軍致討懼非其時又臣老邁非  
所克堪詔不許吳平軍罷帝遣侍中程咸犒師賜充帛  
八千匹增邑八千戶分封從孫暢新城亭侯蓋安陽亭  
侯弟陽里亭侯混從孫闡內侯皆增戶邑充本無南伐  
之謀固諫不見用及吳平大慙欲請罪帝聞充當詣闕

豫幸東堂以待之罷節鉞僚佐仍假鼓吹麾幢充與羣臣上告成之禮請有司具其事帝謙讓不許及疾篤上印綬遜位帝遣侍臣諭旨問疾殿中太醫致湯藥賜牀帳錢帛自皇太子宗室躬省起居太康三年四月卒年六十六無子以外孫韓壽子謚為嗣帝為之慟使使持節太常奉策追增太宰加衮冕之服綠綬綬御劔賜東園秘器朝服一具衣一襲大鴻臚護喪事假節鉞前後部羽葆鼓吹緹麾大路鑾路輜輶車帳下司馬大車椎

斧文衣虎賁輕車介士葬禮依霍光及安平獻王故事  
給塋田一頃謚字長深韓壽子也頗才學既為充嗣與  
賈后中表專恣權傾人主貴游豪戚浮競之徒輻湊其  
門累遷散騎常侍後軍將軍以廣城君喪去職未終起  
為秘書監掌國史立晉書限斷尋轉侍中領秘書監如  
故時謚從帝幸宣武觀校獵諷尚書於會中召謚受拜  
誠左右勿使人知於是衆疑其有異志矣賈后之弑楊  
太后殺太傅楊駿汝南王亮太保衛瓘楚王瑋皆與謚

謀及謚侍講東宮恃其親貴不為愍懷太子降屈與太子奕棊爭道成都王穎在坐叱之曰皇太子國之儲君賈謚何得無禮謚怒言諸賈后出穎為平北將軍鎮鄴初廣城君欲以韓壽女為太子妃太子亦欲昏韓氏以自固壽妻賈午及賈后皆不聽而為太子聘王衍少女太子聞衍長女美而賈后為謚聘之心不能平頗以為言及謚傲縱數為無禮深惡之謚至東宮則舍去入于後庭謚遂蓄憾譖太子於賈后曰太子多蓄私財以給

小人者賈氏故也若宮車晏駕彼居大位依楊氏故事  
誅臣等廢后於金墉如反掌爾不如早圖之更立慈順  
可以自安后深以為然乃詐為有娠納產具取韓壽子  
慰祖養之欲以代太子遂誣構太子謀逆廢于金墉城  
尋殺之及趙王倫討賈后以詔召謚於殿前將誅之謚  
走西鍾下呼曰阿后救我乃就斬之韓壽兄輦令保弟  
散騎侍郎預吳王友鑒少弟蔚謚母賈午皆伏誅於是  
賈郭韓三族無噍類矣



鄭沖字文和滎陽開封人也家貧恬退耽翫經史由是不為州郡辟用及曹丕為太子命沖為文學累遷尚書郎出補陳留太守儒雅無幹局簞食緼袍而以廉稱大將軍爽引為從事中郎轉散騎常侍光祿勳嘉平三年拜司空及曹髦從沖受尚書與侍中鄭小同俱被優禮轉司徒曹真立進拜太保位三司之上封壽侯雖居台輔不預世事從容自保而已及真遜位使沖奉策武帝篡代拜太傅進爵為公司隸李意中丞侯史光奏沖

及何曾荀顗等各以疾病俱應免官武帝不許沖遂不  
視事表乞骸骨帝遣使申喻沖固辭上貂蟬印綬詔又  
不許九年沖又抗表致仕詔以壽光公就第位同保傅  
在三司之右賜几杖不朝朝有大政皆就諮之又賜安  
車駟馬第一區錢百萬絹五百匹牀帷簟褥置舍人六  
人官騎二十人以世子徽為散騎常侍使常優游定省  
祿賜所供策命儀制一如舊典明年卒帝於朝堂發哀  
追贈太傅謚曰成咸寧初有司奏沖與安平王孚等十

二人皆存銘太常配食于廟沖無子以從子徽為嗣位至平原內史

王祥字休徵琅邪臨沂人性至孝早喪其母繼母朱氏不慈數譖之由是失愛於父每使掃除牛下祥愈恭謹父母有疾衣不解帶湯藥必親嘗母常欲食生魚時天寒水凍祥解衣將剖冰求之冰忽自解雙鯉躍出持以奉母母又思黃雀炙復有黃雀數十飛入其幕鄉里驚以為孝感所致有丹柰結實母命守之每風雨祥輒抱樹

而泣其篤孝如此漢末遭亂扶母及弟覽避地廬江隱居三十餘年不應州郡辟命母終居喪毀瘠幾不能起徐州刺史呂虔檄為別駕祥年已六十固辭不受覽勸之為具車牛祥乃應召虔委以州事于時寇盜充斥祥率勵兵士輒討破之州界清靜政化大行州人歌之曰海沂之康實賴王祥邦國不空別駕之功舉秀才除溫令累遷大司農曹髦立與定策功封關內侯拜光祿勳轉司隸校尉從討毋丘儉遷太常封萬歲亭侯髦幸太

學命祥為三老祥南面几杖以師道自居髻北面乞言  
祥陳君臣政化之要聞者莫不警厲及髻遇弒祥號哭  
曰老臣無狀涕淚交流衆有愧色頃之拜司空轉太尉  
加侍中五等建封睢陵侯邑一千六百戶及武帝為晉  
王祥與荀勗往謁勗遂拜而祥獨長揖武帝曰今日方  
知君見顧之重矣及篡代拜太保進爵為公加置七官  
之職御史中丞侯史光奏祥年老請免官祥固乞骸骨  
詔聽以睢陵公就第位同保傅在三司之右祿賜如前

賜安車駟馬第一區錢百萬絹五百匹牀帳簟褥以舍  
人六人為睢陵公舍人置官騎二十人以公子騎都尉  
肇為給事中使常優游定省又以太保高潔清素家無  
宅宇權留本府湏所賜第成乃出泰始五年卒謚曰元  
覽字玄通祥弟也母朱遇祥無道覽見祥被捶撻輒  
涕泣抱持朱以非理使祥覽輒與祥俱又虐使祥妻覽  
妻亦趨而共之朱密酖祥覽知之徑起取酒祥爭而不  
與朱遽反奪之自後朱賜祥饌覽輒先嘗朱遂止於是

欽定四庫全書

續編漢書  
卷七十五下

覽與祥俱以孝友稱累遷宗正卿光祿大夫卒

何曾字穎考太僕夔之子也曾少襲爵好學博聞與同  
郡袁侃齊名曹叡初為平原侯曾為文學及叡立累遷  
散騎侍郎汲郡典農中郎將給事黃門侍郎散騎常侍  
出補河內太守徵拜侍中嘉平中為司隸校尉撫軍校  
事尹模憑寵作威姦利盈積曾奏劾之時曹爽專權司  
馬懿稱疾曾亦謝病爽誅乃起視事曹芳之廢曾謀為  
多正元中為鎮北將軍都督河北諸軍事假節將之鎮

又遷征北將軍進封潁昌鄉侯咸熙初拜司徒改封朗陵侯昭為晉王曾與高柔鄭沖俱為三公入見曾獨拜致敬武帝襲王位以曾為晉丞相加侍中與裴秀王沈等勸進篡代拜太尉進爵為公食邑千八百戶泰始初以本官領司徒曾固讓不許進位太傅以年老屢乞遜位詔進太宰侍中公如故朝會劔履乘輿上殿如漢相國蕭何田千秋魏太傅鍾繇故事賜錢百萬絹五百匹及八尺牀帳簟褥自副置長史掾屬祭酒及員吏一依



欽定四庫全書

續後漢書  
卷七十五下

十二

舊制所給親兵官騎如前主者依次按禮典務使優備  
後每召見敕以常所飲食服物自隨令二子侍從咸寧  
四年卒年八十及葬下禮官議謚博士秦秀議曰謹按  
謚法名與實爽曰繆怙亂肆行曰醜曾之行已與此同  
宜謚繆醜公帝不從策謚曰孝太康末子劭自表改謚  
曰元劭字敬祖趙王倫篡位以為太宰驕奢簡貴又汰  
于曾衣服翫好新故巨積食必盡四方珍異一日之供  
以錢二萬為限雖大官御膳無以加之

謹按晉書永寧  
元年卒贈司徒

謚曰  
康

石苞字仲容渤海南皮人也有智度偉儀觀時人為之  
語曰石仲容姣無雙縣召為吏給農司馬會謁者陽翟  
郭玄信求御司馬以苞及鄧艾給之行十餘里玄信曰  
二子後並當至卿相苞曰御隸也何卿相乎既而被使  
到鄴事久未決乃販鐵於鄴市市長沛國趙元儒名知  
人見苞異之謂苞當至公輔苞見吏部郎許允求為小  
縣允謂苞曰卿是我輩人當在朝廷何小縣乎稍遷司

馬師護軍司馬懿聞苞好色薄行以讓師師曰苞雖細行不足而有經國才畧貞廉之士未必能濟世務是以齊桓忘管仲之奢僭而錄其九合之謀漢高捨陳平之污行而取其六奇之算苞雖未可上儔二子亦今之選也從鄴典農中郎將歷東萊琅邪太守所在有威惠遷徐州刺史司馬昭之敗於東關苞軍獨全昭指所持節謂苞曰恨不以授卿乃遷奮威將軍假節監青州諸軍事及諸葛誕舉兵淮南苞統青州諸軍督兖州刺史

州泰

謹案州泰見邵父傳與此合晉書作周泰誤

徐州刺史胡質簡銳卒為

游軍以備外寇吳遣大將朱異丁奉來援誕苞逆擊破

之異等退走壽春平拜鎮東將軍封東光侯假節頃之

代王基都督揚州諸軍事苞因入朝當還辭曹髦留語

盡日既出白昭曰非常主也數日而有成濟之事後進

位征東大將軍遷驃騎將軍昭卒賈充荀勗議葬禮未

定苞來奔喪慟哭曰基業如此而以人臣終乎葬禮乃

定遂與陳騫諷曹真遜位武帝篡代遷大司馬進封樂

陵郡公加侍中羽葆鼓吹泰始八年卒詔葬禮皆如魏  
司空陳泰故事車駕臨送於東掖門外策謚曰武苞六  
子越喬統浚雋崇以統為嗣歷射聲校尉大鴻臚崇有  
才望累遷衛尉與潘岳等諂事賈謐窮極侈靡趙王倫  
篡逆為孫秀所殺

陳騫字休淵司徒矯之子也

謹案晉書矯本廣陵劉氏  
為外祖陳氏所養因而改

馬沈厚有智謀起家尚書郎遷中山安平太守徵為相  
國司馬長史御史中丞遷尚書封安國亭侯漢兵出隴

右以尚書持節行征蜀將軍諸葛誕起兵復以尚書行  
安東將軍壽春平拜使持節都督淮北諸軍事安東將  
軍進爵廣陵侯轉都督豫州諸軍事豫州刺史持節將  
軍如故又轉都督江南諸軍事徙都督荊州諸軍事征  
南大將軍封郟侯武帝篡代以佐命勲進車騎將軍封  
高平郡公遷侍中大將軍出為都督揚州諸軍事餘如  
故假黃鉞攻拔吳枳里城破涂中屯戍賜騫兄子悝爵  
關中侯咸寧初遷太尉轉大司馬與賈充石苞裴秀等

俱為心膂而騫智度過之充等亦自以為不及咸寧三年求入朝因乞骸骨賜袞冕之服詔聽留京師以前太尉府為大司馬府給乘輿輦出入殿中如漢蕭何故事騫累稱疾辭位許之位同保傅在三司之上賜以几杖不朝安車駟馬以高平公還第帝以其勲舊耆老禮之甚重又以騫有疾聽乘輿上殿元康二年卒年八十一加以袞斂贈太傅謚曰武及葬帝於大司馬門臨喪望柩流涕禮依大司馬石苞故事子與嗣

荀顗字景倩尚書令或之第六子也性至孝總角知名  
博學洽聞理思周密以父勲除中郎司馬懿輔政見顗  
奇之曰荀令君之子也擢拜散騎侍郎累遷侍中拜騎  
都尉賜爵關內侯時曹爽專權何晏等欲害太常傅嘏  
顗營救得免及曹髦立顗言於司馬師曰今上踐阼權  
道非常宜速遣使宣慰四方且察外志毋丘儉文欽果  
不服舉兵顗預討儉等有功進爵萬歲亭侯邑四百戶  
司馬昭輔政遷尚書昭征諸葛誕留顗鎮守顗甥陳泰



卒顓代泰為僕射領吏部顓承泰後綜核名實風俗澄  
正咸熙中遷司空進爵鄉侯以母憂去職昭奏宜依漢  
太傅胡廣喪母故事給司空吉凶導從漢亡復建五等  
命顓定禮儀顓上請羊祜任愷庾峻應貞孔顓共刪改  
舊文撰定晉禮咸熙初封臨淮侯武帝篡代進爵為公  
食邑一千八百戶遷司徒尋加侍中遷太尉都督城外  
牙門諸軍事置司馬親兵百人頃之又以顓行太子太  
傅侍中太尉如故泰始十年卒帝為舉哀皇太子臨喪

二宮賻贈禮秩有加顓明三禮知朝廷大儀而無質直之操惟阿意苟合於荀勗賈充之間初皇太子將納妃顓上言賈充女姿德淑茂可以參選以此獲譏於世顓無子以從孫徽嗣

裴秀字秀彥尚書令潛之子也八歲能屬文及長兼綜學藝時人為之語曰後進領袖有裴秀度遼將軍毋丘儉薦秀於大將軍曹爽爽乃辟為掾襲父爵清陽亭侯遷黃門侍郎爽誅以故吏免頃之為廷尉正歷司馬昭

安東及衛將軍司馬遷散騎常侍討諸葛誕秀與尚書僕射陳泰黃門侍郎鍾會以行臺預參謀畧誕平轉尚書進封魯陽鄉侯增邑千戶曹奐立以豫議定策進爵縣侯增邑七百戶遷尚書僕射咸熙初釐革制度荀顗定禮儀賈充正法律而秀改官制焉五等建封秀濟川侯初昭未定嗣而屬意舞陽侯攸武帝懼不得立問秀曰人有相否因以奇表示之秀言於昭曰中撫軍人望既茂天表如此固非人臣之相也由是世子乃定武帝即

王位拜尚書令右光祿大夫與御史大夫王沈衛將軍  
賈充俱開府加給事中及篡代登遜之際總握幾要儀  
制典則皆所裁定加左光祿大夫封鉅鹿郡公邑三千  
戶拜司空以職在地官以禹貢山川地名從來久遠多  
有變易從世說者或彊牽引漸以闇昧於是甄擿舊文  
疑者則闕古有名而今無者皆隨事註列作禹貢地域  
圖十八篇奏之藏於祕府服寒食散當飲熱酒而飲冷  
酒泰始七年卒年四十八詔謚曰元二子濬顧濬嗣位

至散騎常侍早卒濟庶子憬不慧別封高陽亭侯以弟  
顧嗣

荀勗字公曾漢司空爽曾孫也年十餘歲能屬文從外  
祖太傅鍾繇曰此兒當及其曾祖既長博學練達政理  
辟大將軍曹爽掾遷中書通事郎爽誅門生故吏無敢  
往者勗獨臨赴出為安陽令有遺愛縣為立祠轉驃騎  
從事中郎遷廷尉正參司馬昭大將軍軍事爵關內侯  
轉從事中郎領記室曹髦討昭大將軍掾孫佑守閭闔

門昭弟安陽侯幹聞變欲入佑拒之幹還白昭欲族誅  
佑勗諫曰孫佑不納安陽誠宜深責然事有逆順不可  
以喜怒為輕重今成倅刑止其身佑乃族誅恐貽私議  
乃免佑為庶人與裴秀羊祜共管機密昭為晉王以勗  
為侍中封安陽子邑千戶武帝篡代勗謀居多封濟北  
郡公勗以羊祜讓乃固辭為侯拜中書監加侍中領著  
作與賈充共定律令俄領祕書監與中書令張華依劉  
向別錄整理記籍又立書博士置弟子教習以鍾胡為

法王濬表請伐吳勗與賈充固諫帝不從而吳果滅以  
專典詔命功封子一人為亭侯邑一千戶賜絹千匹又  
封孫顯為潁陽亭侯太康中以勗為光祿大夫儀同三  
司開府辟召守中書監侍中侯如故久之以勗守尚書  
令勗久在中書專管機事及失之甚惆悵或有賀之者  
勗曰奪我鳳凰池諸君何賀我耶居職月餘以母喪上  
還印綬帝不許遣常侍周恢喻旨勗乃視事勗久管機  
密有才思探得人主微旨不犯顏忤爭故得始終全其

寵祿太康十年卒詔贈司徒謚曰成勗十子其達者輯  
藩組輯嗣官至衛尉卒謚曰簡子駿嗣卒謚曰烈無適  
子以弟息識為嗣馮統字少冑安平人博涉經史機悟  
詭譎仕為魏郡太守累遷越騎校尉以便佞得幸武帝  
遷左衛將軍寵愛日隆與荀勗朋附賈充納賈妃出齊  
王攸皆其謀也疾張華如讎華之都督幽州至鎮撫循  
夷夏譽望益振帝復欲徵之統侍帝從容語及鍾會統  
曰會之反頗由太祖帝變色曰卿是何言耶統免冠謝



曰臣聞善馭者必知六轡緩急之宜故孔子以仲由兼人而退之冉求退弱而進之漢高祖尊寵五王而夷滅光武抑損諸將而克終非上有仁暴之殊下有愚智之異也蓋抑揚與奪使之然爾鍾會才智有限而太祖誇獎無極居以重勢委以大兵使會自謂算無遺策功在不賞遂構凶逆爾向令太祖錄其小能節以大禮抑之以威權納之以軌則則亂心無由生矣帝曰然統稽首曰陛下既然臣之言宜思堅冰之漸勿使如會之徒復

致傾覆帝曰當今豈復有如會者邪統因屏左右而言曰陛下謀畫之臣著大功於天下據方鎮總戎馬者皆在陛下聖慮矣帝默然由是止不徵華時謂統之讒賊楚費晉五不是過矣太康七年疾篤詔以為散騎常侍卒帝甚惜之

議曰王沈賈充皆世饗魏祿朋扇篡竊親為弑逆首倡禪代校諸逆黨師昭之次也鄭沖王祥經明行修德有餘而節不足與何曾石苞等皆以魏大臣為晉上公號

八公改代易姓而居位自如謂不與篡得乎充諸人其  
始皆以至孝稱終則或謚之為孝至於何曾之責阮籍  
欲投之四裔儼然以大孝自處夫孝始於事親終於事  
君故以孝事君則忠率理不越守死善道全德踐形乃  
可謂孝故舜烝烝乂不格姦明於庶物察於人倫曾子  
省身守約易簣正終啓手啓足全而歸之乃為至孝彼  
方屑屑於飲食起居之間輒敢黨賊篡弑自陷大逆如  
充成濟之事竟欺其母不使之知忍聞逆賊之罵又焉

得為孝孚荀勗馮統諂附于充夤緣勢位沽街小慧協  
圖大姦立賈后出齊王深樹禍本宋邵雍有言晉室之  
禍不在於石勒長嘯上東門時在荀勗夕陽亭之一語  
嗚呼既亡魏又亡晉復亡中國既覆賈氏又覆荀氏小  
人患失一至此哉

贊曰以盜為常公行攘篡魏遽為晉王路多難禪陵未  
揜鄴臺已荒區區偷兒覩面高光

--	--	--	--	--	--	--	--	--

欽定四庫全書

續後漢書卷七十六

元 郝經 撰

列傳第七十三

取漢

謹案平吳傳有前序取漢傳當亦有序今闕

鄧艾

州泰設灼

鍾會

向雄

衛瓘

鄧艾字士載義陽人也

謹案陳志作義陽棘陽人

少孤曹操破荊州

徙汝南為農民養犢年十二隨母至潁川讀書故太丘

長陳實碑言文為世範行為士則艾遂自名範字士則

後族有與同者故改焉為都尉學士以口吃不得作幹  
佐為稻田守叢草吏同郡吏父憐其家貧資給甚厚父  
初不為謝每見高山大澤輒規度指畫軍營處所時人  
竊笑焉後為典農綱紀上計吏因使見太尉司馬懿懿  
奇之辟為掾遷尚書郎

原注世語鄧艾少為襄城典農  
與部民石苞皆年十二三謂者

陽翟郭玄信武帝監軍郭誕元奔之子建安中少府告  
本起兵許都玄信坐被刑在家從典農司馬求入御以  
艾苞與御行十餘里與語悅之謂二人皆當遠至為佐  
相艾後為典農功曹奉使詣宣王由此見知遂被拔擢  
時欲廣田畜穀為伐吳資使艾行陳項已東至壽春艾

以爲田良水小不足以盡地利宜開河渠可以引水澆  
溉大積軍糧又通運漕之道乃著濟河論以喻其指又  
謂昔破黃巾因爲屯田積穀於許都以制四方今三隅  
已定事在淮南每大軍征舉運兵過半功費巨億以爲  
大役陳蔡之間土下田良

謹案陳志作  
上下田良

可省許昌左右

諸稻田并水東下令淮北屯二萬人淮南三萬人  
十二分休常有四千人且田且守水豐常收三倍  
於西計除衆費歲完五百萬斛以爲軍資六七年間可



積三十萬斛於淮上此則十萬之衆五年食也以此來

吳無往而不克矣懿善之事皆施行

謹案通典曰宣王善之皆如艾計遂

北臨淮水自鍾離西南橫石以西盡泚水四百餘里置一營六千人且耕且守兼循廣淮陽百尺二渠上引河流下通淮潁大理諸陂於潁南北穿渠三百餘里溉田三萬頃淮南淮北皆相連接自壽春到京師農田兵田雞犬之聲阡陌相屬正始二年乃開廣漕渠每東南有事大軍興

衆泛舟而下達於江淮資食有儲而無水害出參征西軍事遷南安太守嘉平元年與征西將軍郭淮拒漢偏將軍姜維維退淮因西擊羗艾曰賊去未遠或能復還

宜分諸軍以備不虞於是留艾屯白水北三日維遣廖  
化自白水南向艾結營艾謂諸將曰維今卒還吾軍人  
少法當來渡而不作橋此維使化持吾令不得還維必  
自東襲取洮城洮城在水北去艾屯六十里艾即夜潛  
兵徑到維果來渡而艾先至據城得以不敗賜爵關內  
侯加討寇將軍後遷城陽太守時并州右賢王劉豹并  
為一部艾上言曰戎狄獸心不以義親疆則侵暴弱則  
內附故周宣有玁狁之寇漢祖有平城之困每匈奴一

盛為前代重患自單于在外莫能牽制長卑誘而致之使來入侍由是羗夷失統合散無主以單于在內萬里順軌今單于之尊日踈外土之威寢重則胡虜不可不深備也聞劉豹部有叛胡可因叛割為二國以分其勢去卑功顯前朝而子不繼業宜加其子顯號使居鴈門離國弱寇追錄舊勲此御邊長計也又陳羗胡與民同處者宜以漸出之使居民表崇廉耻之教塞姦宄之路大將軍司馬師新輔政多納用焉遷汝南太守至則尋

求昔所厚已吏父久已死遣吏祭之重遺其母舉其子  
為計吏父所在荒野開闢軍民並豐諸葛恪圍合肥新  
城不克退歸父言於師曰孫權已沒大臣未附吳名宗  
大族皆有部曲阻兵仗勢足以建命恪新秉國政而內  
無其主不念撫恤上下以立根基競於外事虐用其民  
悉國之衆頓於堅城死者萬數載禍而歸此恪獲罪之  
日也昔子胥吳起商鞅樂毅皆見任時君主沒而敗况  
恪才非四賢而不慮大患其亡可待也恪歸果見誅遷

兗州刺史加振威將軍上言曰國之所急惟農與戰國富則兵彊兵彊則戰勝然農者勝之本也孔子曰足食足兵食在兵前也上無設爵之勸則下無財富之功今使考績之賞在於積粟富民則交游之路絕浮華之原塞矣曹髦立進封方城亭侯毋丘儉作亂遣健步齎書欲疑惑大衆艾斬之兼道進軍先趣樂嘉城作浮橋司馬師至遂據之文欽以後大軍破敗於城下艾追之至丘頭欽奔吳吳大將軍孫峻等號十萬衆將渡江鎮東

將軍諸葛誕遣艾據肥陽艾以與賊勢相遠非要害之地輒移屯附亭遣泰山太守諸葛緒等於黎漿拒戰遂走之其年徵拜長水校尉以破欽等功進封方城鄉侯行安西將軍解雍州刺史王經圍於狄道姜維退駐鍾提乃以艾為安西將軍假節領護東羌校尉議者多謂維力已竭未能更出艾曰洮西之敗非小失也破軍殺將倉廩空虛百姓流離幾於危亡今以策言之彼有乘勝之勢我有虛弱之實一也彼上下相習五兵犀利我

將易兵新器仗未復二也彼以船行吾以陸軍勞逸不同三也狄道隴西南安祁山各當有守彼專為一我分為四四也從南安隴西因食羌穀若趣祁山熟麥千頃為之縣餌五也賊有點數其來必矣頃之維果向祁山聞艾已有備乃回從董亭趣南安艾據武城山以相持維與艾爭險不克其夜渡渭東行緣山趣上邽艾與戰於段谷大破之甘露元年詔曰逆賊姜維連年狡黠民夷騷動西土不寧艾籌畫有方忠勇奮發斬將十數馘

首千計國威震於巴蜀武聲揚於江岷今以艾為鎮西將軍都督隴右諸軍事進封鄧侯分五百戶封子忠為亭侯二年拒姜維於長城維退還遷征西將軍前後增邑六千六百戶景元三年又破維於侯和維却保沓中四年秋詔諸軍攻漢大將軍司馬昭皆指授節度使艾與維相綴連雍州刺史諸葛緒要維令不得歸艾遣天水太守王頌等直攻維營隴西太守牽弘等邀其前金城太守楊欣等詣甘松維聞鍾會諸軍已入漢中引還



欣等追躡於彊川口大戰維敗走聞雍州已塞道屯橋頭從孔函谷入北道欲出雍州後諸葛緒聞之却還三十里維入北道三十餘里聞緒軍却尋還從橋道過緒趣截維較一日不及維遂東引還守劔閣鍾會攻維未能克艾上言今賊摧折宜遂乘之從陰平由邪徑經漢德陽亭趣涪出劔閣西百里去成都三百餘里奇兵衝其腹心劔閣之守必還赴涪則會方軌而進劔閣之軍不還則應涪之兵寡矣軍志有之曰攻其不備出其不

意今掩其空虛破之必矣冬十月艾自陰平道得無入  
之地七百餘里鑿山通道造作橋閣山高谷深至為艱  
險又糧運將匱瀕於危殆艾以氍自裹推轉而下將士  
皆攀木緣崖魚貫而進先登至江由漢守將馬邈降漢  
衛將軍諸葛瞻自涪還綿竹列陳待艾艾遣子惠唐亭  
侯忠等出其右司馬纂等出其左忠纂戰不利並退還  
曰賊未可擊艾怒曰存亡之分在此一舉何不可之有  
乃叱忠纂等將斬之

謹案等今志作出  
宋本作等與此合

忠纂馳還更戰

大破之斬瞻及尚書張遵等首進軍到雒漢帝遣使奉  
皇帝璽綬為牋詣艾請降艾至成都漢帝率太子諸王  
及羣臣六十餘人面縛輿櫬詣軍門艾執節解縛焚櫬  
受而宥之檢御將士無所虜畧綬納降附使復舊業漢  
人稱焉輒依鄧禹故事承制拜漢帝行驃騎將軍太子  
奉車諸王駙馬都尉漢羣司各隨高下拜為王官或領  
艾官屬以師纂領益州刺史隴西太守牽弘等領蜀中  
諸郡使於緜竹築臺以為京觀用彰戰功士卒死事者

皆與漢兵同共埋藏艾深自矜伐謂漢士大夫曰諸君  
賴遭艾故得有今日爾如遇吳漢之徒已殄滅矣又曰  
姜維自一時雄兒也與艾相值故窮爾識者笑之十二  
月詔曰艾曜威奮武深入虜庭斬將塞旗梟其鯨鯢使  
僭號之主稽首係頸歷世逋誅一朝而平兵不踰時戰  
不終日雲徹席卷蕩定巴蜀雖白起破彊楚韓信克勁  
趙吳漢禽子陽亞夫滅七國計功論美不足比也其以  
艾為太尉增邑二萬戶封子二人亭侯各食邑千戶

原注

索子曰諸葛亮重人也而驟用蜀兵此知小國弱民難以久存也今國家一舉而滅蜀自征伐之功未有如此之速者也方鄧艾以萬人入江由之危險鍾會以二十萬衆留劔閣而不得進三軍之士已饑艾雖戰勝克將使劉禪數日不降則二將之軍難以反矣故功業如此之難也國家前有壽春之役後有滅蜀之勞百姓貧而倉庫虛故小國之慮在於乘時立功以自存大國之慮在於既勝而力竭成功之後戒懼之時也艾言

於司馬昭曰兵有先聲而後實者今因平蜀之勢以乘吳吳人震恐席卷之時也然大舉之後將士疲勞不可使用且徐緩之留隴右兵二萬人蜀兵二萬人煮鹽興冶為軍農要用並作舟船豫順流之事然後發使告以

利害吳必歸化可不征而定也今宜厚劉禪以致孫休安士民以來遠人若便送禪於京都吳以為流徙則於向化之心不勸宜權停留須來年秋冬比爾吳亦定平以為可封禪為扶風王錫其資財供其左右郡有董卓塢為之宮舍爵其子為公侯食郡內縣以顯歸命之寵開廣陵城陽以待吳人則畏威懷德望風而從矣昭使監軍衛瓘喻艾事當須報不宜輒行艾重言曰銜命征行奉指授之策元惡既服至於承制拜假以安初附謂

合權宜今蜀舉衆歸命地盡南海東接吳會宜早鎮定  
若待國命往復道途延引日月春秋之義大夫出疆有  
可以安社稷利國家專之可也今吳未賓勢與蜀連不  
可拘常以失事機兵法進不求名退不避罪艾雖無古  
人之節終不自嫌以損於國也鍾會胡烈師纂等皆白  
艾所作悖逆變累已結詔書檻車徵艾艾仰天嘆曰艾  
忠臣也一至此乎白起之酷復見今日矣艾父子既囚  
鍾會至成都先送艾然後作亂會死艾本營將士追出

艾檻車迎還璫遣田續等討艾過於縣竹西斬之子忠

與艾俱死餘子在雒陽者悉誅徙艾妻子及孫於西城

謹案西城陳志作西域通志作西城與此合考後漢書郡國志益州有西城郡師纂亦與艾俱

死纂性急少恩死之日體無完膚初艾當伐漢夢坐山

上而有流水以問殄虜護軍爰邵邵曰按易卦山上有

水蹇蹇繇曰蹇利西南不利東北孔子曰蹇利西南往

有功也不利東北其道窮也往必克蜀殆不還乎艾懽

然不樂

原注荀綽冀州記邵起自幹吏位至衛尉長子翰河東太守中子敞大司農小子倩字君幼寬



厚有器局勤於當世歷位冀州刺史太子右衛率領子  
俞字世都清真貴素辯於論議採公孫龍之辭以談微理  
少有能名辟太尉府稍歷顯位至侍中中書令遷為監  
裴松之曰按蹇豕辭云蹇利西南往得中也不云有  
功下云利見大人往有功也邵孟斷章取義不  
拘本文故以有功代得中也若此前書多有之泰始元  
年晉武帝篡代詔曰昔太尉王凌謀廢齊王而王竟不  
足以守位征西將軍鄧艾矜功失節實應大辟然被書  
之日罷遣人衆束手受罪比於求生遂為惡者誠復不  
同今大赦得還若無子孫者聽使立後令祭祀不絕三  
年議郎段灼上疏理艾曰艾心懷至忠而荷反逆之名

平定巴蜀而受夷滅之誅臣竊悼之惜哉言艾之反也  
艾性剛急輕犯雅俗不能協同朋類故莫肯理之臣敢  
言艾不反之狀昔姜維有斷隴右之志艾脩治備守積  
穀彊兵值歲凶旱又為區種身被烏衣手執耒耜以率  
將士上下相感莫不盡力艾持節守邊所統萬數而不  
難僕虜之勞士民之役非執節忠勤孰能若此故落門  
段谷之戰以少擊多摧破彊賊先帝知其可任委艾廟  
勝授以長策艾受命忘身束馬縣車自投死地勇氣凌

雲士衆乘勢使劉禪君臣面縛又手屈膝艾功名以成  
當書之竹帛傳祚萬世七十老公反欲何求艾誠恃養  
育之恩心自不疑矯命承制權安社稷雖違常科有合  
古義原心定罪本在可論鍾會忌艾威名構成其事忠  
而受誅信而見疑頭懸馬市諸子并斬見之者垂泣聞  
之者歎息陛下龍興闡弘大度釋諸嫌忌受誅之家不  
拘叙用昔秦民憐白起之無罪吳人傷子胥之冤酷皆  
為立祠今天下民人為艾悼心痛恨亦猶是也臣以為

父身首分離捐棄草土宜收屍喪還其田宅以平蜀之功  
紹封其孫使闔棺定謚死無餘恨赦冤魂於黃泉收  
信義於後世葬一人而天下慕其行埋一魂而天下歸  
其義所為者寡而悅者衆天下徇名之士思立功之臣  
必投湯火樂為陛下死矣

謹案天下徇名之士二十  
十字陳志無此據晉書帝嘉

之九年詔曰父有功勲受罪不逃刑而子孫為民隸朕  
常愍之其以嫡孫朗為郎中父在西時脩治障塞築起  
城塢泰始中羌虜大叛頻殺刺史涼州道斷吏民安全

者皆保艾所築塢焉咸寧中積射將軍樊震為西戎牙門武帝問震所由進震自陳為鄧艾伐蜀時帳下將帝遂問艾死狀震具陳艾之忠言輒流涕先是以艾孫朗為丹水令由此遷為定陵令次孫千秋有時望光祿大夫王戎辟為掾永嘉中朗為新都太守未之官在襄陽遇火及母妻子舉室燒死惟子韜行得免千秋先卒二子亦燒死艾州里時輩南陽州泰亦好立功業善用兵荊州刺史裴潛以為從事司馬懿鎮宛潛數遣泰詣懿

由此為懿所知及征孟達泰又導軍遂辟泰泰頻喪考

妣祖九年居喪懿留缺待之至三十六日擢為新城太

守

原注世說司馬宣王為泰會使尚書鍾繇調泰君釋褐登宰府三十六日擁麾蓋守兵馬郡乞兒乘小車

一何馭手泰曰誠有此君名公之子少有文采故守吏職獼猴騎土牛又何遲也衆賓咸悅

後歷充

豫州刺史所在有績效累遷征虜將軍假節都督江南

諸軍事景元二年卒追贈衛將軍謚曰壯侯段灼

謹案晉書

灼字休然數煌人

從鄧艾伐漢有功封關內侯入為議郎既申

鄧艾又數上書言事謀謨經遠辭旨慷慨有國士之風

累遷明威將軍魏興太守

謹案晉書云卒於官

謹案目錄此下有鍾會衛瓘傳今闕

議曰鍾會徵冀謀叛鄧艾專擅致嫌衛瓘詭計斃之得國而終不振旅荀卿曰兼并易能也堅疑之難哉然而當會之構艾瓘能拒之則艾不禽艾不禽則會不反亂何自而生哉與會圖艾濟其姦遂并誅滅獨享成功光賁公袞卒之父子九人一夕并命於是知天道之不可誣也

賛曰火德告終岷峨失險三臣同罪功以過揜



--	--	--	--	--	--	--	--